

Tropicana lancar kediaman Skypark Kepler di Johor

Tropicana Corporation Bhd melancarkan projek kediaman pertama bersama Banyan Group untuk membangunkan Skypark Kepler pada harga bermula daripada RM790,000.

Dengan nilai pembangunan kasar (GDV) sebanyak RM2.1 bilion, kediaman berjenama pegangan bebas di Johor itu dijangka siap empat hingga lima tahun lagi.

Pembangunan itu bakal menjadi ikon baharu dengan dua menara setinggi 54 tingkat yang dilengkapi dengan 1,596 unit mewah direka lengkap dengan susun atur satu hingga tiga bilik tidur; berkeluasan antara 463 kaki persegi (satu tambah satu bilik) hingga 807 kaki persegi (tiga bilik dan tiga bilik mandi).

Ketua Pegawai Eksekutif Kumpulan Tropicana, Datuk Mark Rozario, berkata Tropicana terus meneroka sempadan baharu melalui pembangunan ikonik.

“Dengan Skypark Kepler, kami ingin mencipta pengalaman transformasi untuk pembeli hartanah, di mana mereka boleh menikmati kehidupan bandar pintar yang digabungkan dengan gaya hidup mewah dalam persekitaran lestari.

“Kami bangga dapat bekerjasama dengan jenama global seperti Banyan



Rozario (kiri) dan Pengurus Negara Kohler, Jamie Chow pada Majlis Menandatangani Projek Skypark Kepler dengan Banyan Group, di Petaling Jaya, semalam.
(Foto Adlina Azahari/BH)

Group, Samsung dan Kohler untuk projek kediaman berjenama pertama kami, Skypark Kepler,” katanya pada Majlis Menandatangani Projek Skypark Kepler dengan Banyan Group, di Petaling Jaya, semalam.

Tropicana turut menandatangani kerjasama dengan Samsung dan Kohler untuk menyediakan kelengkapan rumah mewah, peralatan dan kelengkapan sanitari.

Peralatan Samsung Bespoke Kecerdasan Buatan (AI) akan diintegrasikan dengan sistem rumah pintar Moorgen, salah satu pengeluar

rumah pintar terkemuka di dunia.

Rozario berkata, dengan kepakaran dalam industri hartanah serta kerjasama dengan syarikat antarabangsa, beliau yakin projek itu akan menarik lebih ramai pembeli, daripada pelabur dan penduduk Singapura kepada golongan yang mencari gaya hidup berkualiti.

“Zon Ekonomi Khas Johor-Singapura (JS-SEZ) akan menjadi pemangkin untuk meningkatkan kerjasama ekonomi dua hala dan membuka potensi pertumbuhan di Malaysia dan Singapura,” katanya.